

7.7
EPISTRE
DE MONSIEVR
LE
PRESIDENT
DE THOU.
Au Roy.

3162
250



A PARIS,
Chez PIERRE CHEVALIER, rue S.
Iacques, à l'image saint Pierre,
pres les Mathurins.

M. DC. XIV.

Avec privilege du Roy.

LE
PRESIDENT
DE THOU
AU ROY



A PARIS

chez Pierre CHENAVIER, chez
laque, a l'angle de la Porte
des Mathurins


M. D. C. L. X. V.

de la Librairie de



EPISTRE DE MONSIEVR LE PRESIDENT DE THOV.

AV ROY.



I R E,
Quand ie me mi premiere-
ment à écrire l'Histoire de ce
temps, encore que ie sceusse
bien que ce que i'entreprendoi,
tout tel qu'il pourroit estre,
appresteroit à parler à beau-
coup de gens. Toutefois ma

consolation estoit que ie ne m'y sentoï point pous-
sé d'aucune vanité d'ambition; ains d'un bon zele
& sincerité de conscience seulement: qui me pro-
mettoit qu'avec le temps, les rancunes & animosi-
tez cessants d'une part & d'autre, on auroit quel-
que iour enuie de sauoir les choses au vray, mesme-
ment durant vostre regne, ou par vne grace singu-
liere de Dieu, apres auoir chassé les monstres de re-
bellion, & du tout estaint ce qui entretenoit le feu
des factions, vous auez rendu la paix à la France, &
avec la paix réuni deux choses qu'on tenoit incom-
patibles, la Monarchie, & la Liberté. Ioint aussi
que ie commencai à mettre la main à la plume en
vne saison que nous regrettions de voir les causes

de la guerre ciuile attachees aux particulieres conuoitises de gens ambitieux, & l'esperance de la paix chassée des conseils qui regardoient le public: tellement que i'estimoï qu'il nous fust de tant plus permis de dire, & d'écrire librement, sans mesdisance toutesfois, ce qui en estoit à la pure verité. Mais comme l'œuvre s'est acheminé, lequel i'auoï premieremēt tracé en vostre armee, aux sieges des villes entre les trompettes & tambours, puis continué en vostre Cour, & maintenant entre les fastueuses occupations du palais, & des voyages ou autres affaires, amené iusques à vostre regne. Ie me suis trouué touché d'un sentiment tout autre que ie n'auois esté du commencement, lors que mō esprit arresté en la grandeur & varieté des choses dōt i'auois à parler: & cherchant quelque soulagement parmi les miseres publiques, estoit tout occupé à mediter & à écrire: Iusques là, qu'il m'est tombé en l'ame de craindre, que ce que i'auois escrit parmi le bruit des armes, qui pouuoit en ce temps là estre agreable, ou à tout le moins excusable, n'offense les aureilles difficiles de quelques vns, à present que les choses sont paisibles, & les troubles composez: Comme nous sommes naturellement plus prompts & enclins à faire le mal qu'à l'ouïr raconter. Mais puis que la premiere regle de l'histoire est de n'oser rien dire de faux, & par consequent oser dire tout ce qui est vray. Ie me suis traouillé de tirer la verité quelquefois cachée, & quelquefois enseuelie entre les rancunes des partialitez, & la représenter de bonne foy à la posterité, pour ne preuariquer en vne cause si iuste, par vne affectation de prudence desaccaysonnée, & pour ne faire iniure au rare bō-heur de vostre siecle, auquel il est

permis à chacun de penser ce qu'il veut, & de dire
ce qu'il pense. Quant à moy i'ay cette assurance
que ceux qui me cognoissent & qui sçauent quelles
sont mes mœurs, sçauent aussi combien ie suis
eslongné de la dissimulation: Et n'ay point vescu si
caché que ma franchise & candeur n'ayt esté reco-
gnuë, voire des plus iniques & mal affectionnez,
quand il a esté question d'affaires publiques. Car
apres que par vostre vertu & clemence nous auons
esté tous reconciliez les vns avec les autres, i'ay
tellement oublié les iniures priuees, si aucunes on
m'auoit faictes, & en ay tellement perdu le senti-
ment en mon particulier & en public, qu'à bon
droict ie me puis vanter que personne ne me trou-
uera auoir manqué de moderation & de patience,
en ce qui touche la memoire des choses passees.
I'en puis appeller à tesmoins ceux mesmes dont les
noms se rencontreront souuent mentionnez en
ces liures, qui m'ont tousiours trouué prests à leur
rendre tous bons offices, sans corruption à toutes
les fois qu'ils ont eu affaire de moy en la charge
qu'il a pleu à vostre Majesté me commettre. I'ay
donc faict en entreprenant d'escrire ceste histoire,
ce que les bons Iuges doiuent faire quand ils deli-
berent sur la vie & l'honneur des hommes. Ie me
suis souuent tasté & interrogé moy-mesme, pour
fonder si ma conscience estoit picquée de quelque
esguillon de ressentiment qui me peust transporter
& destourner du droict chemin. I'ay adoucy tant
que i'ay peu par paroles l'aigreur des choses: &
tousiours me suis retenu d'y asseoir mon iuge-
ment, sans extrauaguer en discours ny sortir
de mon propos: Bref i'ay fuiuy vn genre d'escrire
nu & simple, pour tesmoigner par mon stile mes-

me, que toutainſi qu'il eſt ſans fard & oſtentation, auſſi ne porte-je ny haine ny faueur à perſonne. De pareille façon, ie voudroi volontiers prier nos François & autres qui liront ceci, de n'aporter point de preiugé du logis avec eux, pour dire leur auis, & prononcer de mon œuvre auparauant que l'auoir tout leu. Je ne nieray point que mon entrepriſe ne ſoit grande, & par deſſus mes forces: voire que pour la bien executer, beaucoup de choſes y ſeroient neceſſaires que ie n'ay pas. Mais ie me ſuis laiſſé vaincre à l'vtilité publique, & au deſir ardent de meriter quelque choſe de ceux de noſtre temps, & de ceux qui viendront apres nous: à quoy taſchant paruenir, i'ay mieux aymé qu'on me tienne pour temeraire que pour ingrat. Car ie ne me traualle pas tant de la creance qu'on y doit auoir, pour laquelle i'ay ma conſcience aſſeuree: ny de mon induſtrie, & ſuffiſance, dont i'eſpere que voſtre clemence, & la candeur des lecteurs excuſera le deſaut, comme ie crains que ce qui fait la principale partie de l'hiſtoire ne ſoit ennuieux, & moleſte à pluſieurs, qui ſe penſants eſtre hors du danger, ſe montrent trop negligents, & moins equitables en la miſere d'autrui. Par-ce qu'outre, & par deſſus pluſieurs maux qui croiſſent en ce ſiecle ennemy de la vertu, eſt ſuruenue d'abondant le diſcord en la religion, qui tourmente toute la Chreſtienté de guerres continuelles, preſque depuis cent ans, & la tourmentera encor cy-apres, ſi ceux qui principalement y ont intereſt, n'y apportent quelques remedes à propos, autres que ceux dont on a vſé cy-deuant: Car nous n'auons que trop appris par experiēce, que le fer, le feu, les bāniſſemēts, & proſcriptiōs ont irrité pluſtoſt que guerir ceſte maladie atachee à

l'esprit pour laquelle traicter est besoing d'vser, nō de ce qui ne penetre que le corps: mais de doctrine & d'instructiō qui descend & distile tout doucemēt dedans l'ame: d'autant que toutes autres choses sont gouuernees par le iugemēt du magistrat ciuil, & principalement du Prince. Mais la religion seule ne peut estre commandee: ains se coule aux esprits bien preparez par vne opinion presuppsee de la verité, avec l'ayde de la grace diuine.

A cela les tourments ne seruent de rien: voire plustost endurecissent les cœurs au lieu de les amolir & persuader: Et pouuons dire beaucoup plus iustement de la Religion, ce que les Stoïques ont si magnifiquement vanté de leur sagesse: Car quand quelqu'un est poussé de Religion, les tourments & les douleurs n'ont point de pouuoir sur luy: & toutes autres incōmoditez sont surmōtees par la force qui est engendree de ceste opinion, dont il est preoccupé interieurement: rien de tout ce qu'il a à souffrir ne luy deplaist; & ne se plaint, quoy qui luy aduienne, de tout ce qui peut aduenir à l'homme: Il cognoist ses forces, & se persuadent qu'il est assisté de la grace de Dieu, il cuide estre assez fort pour porter toute sorte de persecution: Qu'un bourreau soit d'un costé, & les questionnaires d'un autre pour luy appliquer le fer, & le feu, il ne laissera pas de perseuerer, & ne pensera pas à ce qu'il aura à souffrir, mais à ce qu'il aura à faire: car la felicité est chez luy-mesmes: & si quelque chose interuient par dehors, elle luy est peu, & ne luy fait seulement qu'ésfleurer la peau. Qu'est-ce que dict Epicure, (qui toutesfois est tenu des autres Philosophes pour vn peu corrompu:) quand il parle de l'homme sage? Si on le fait brusler dans le taureau

de Phalaris ; il dira, ô que cecy est doux ! cecy ne me touche point. Pensons nous que ceux qui depuis cent ans se sont perdus par diuerses sortes de supplices, à cause de la Religion, ayent eu moins de courage, ou que ceux qui se perdront encor cy-après, si on continuë à les punir, soient plus lasches ? l'Histoire de ce que fit & dist vn de ces gens-là merite d'estre racompree: lequel lors qu'on l'atachoit au poteau prest à estre brulé: se mettât à genoux, commença à chanter vn pseaulme, que la flamme & la fumee peurent à peine faire cesser: Et comme le bourreau voulut mettre le feu au bucher, & commençast par derriere afin que le patient ne le vist point: Vien, vien, dit-il par detiant, & allume hardiment deuant mes yeux: Si i'eusse craint le feu ie ne feusse pas icy, puis qu'il estoit en ma puissance de m'en sauuer. Aussi n'auôs nous point veu que ceux qui ont fait des entreprises à cause de la Religion, ayent rien rabatu de leur ardeur par les punitions & supplices qu'on a exercé contre eux: mais au contraire ils se sont de tant plus endurcis & opiniastrez à souffrir, & à oser d'auantage: Car des cendres des vns, les autres sont nez, & leur nombre a creu, & leur patience s'est tournee en fureur. Tellement qu'au lieu de supplians, comme ils estoient auparauant, ils sont deuenus complaignans & importuns demandeurs: puis ne se contentans de se defendre des gibets, ils ont pris les armes, & se sont mis d'eux-mesmes à prouoquer & assaillir ceux qui les persecutoient. C'est ce que nous voyons depuis quarante ans tous entiers en France, & gueres moins en Flandres: Et en sommes venus là, que meshuy le mal ne se peut plus retrancher & retenir de couler par la punition d'vn

d'un ou de deux, cōme parauēture on pouuoit faire du commencement, mais ayant occupé des peuples & des nations, voire la plus grande partie de l'Europe, il n'est plus qu'estion d'vser du glaue du magistrat ains du trenchant de la parole de Dieu : car ceux qui ne peuuent estre forcez & contrainsts de croire, doiuent estre instruits & enseignez par raison moderee, & inuitez à conferer & communiquer amiablement ensemble. Sainct Augustin en a fait ainsi, escriuant à Proculian grand partizan des Donatistes, pour lesquels mesmes il prioit le Proconsul d'Afrique, afin qu'il n'vlast de peine de mort contre eux : comme estant bien seant à ceux qui font profession de la yraye Religion, de guerir l'erreur d'une vaine heresie, plustost par douces menaces que par vengeance & cruauté : afin de ne s'estonner de ceste maxime qui doit estre perpetuelle entre les Chrestiens, de vaincre le mal par le bien : ainsi que le mesme saint Augustin escrit en un autre endroit au gouverneur Cecilian. Et en ceste lōgue Epistre qu'il adresse à Boniface, il adioust, qu'en tels accidens où le schisme & la dissention ne met pas seulement en danger deux ou trois hommes, mais importe de la ruine de peuples, & de nations ; il faut diminuer quelque chose de la seuerité, & suruenir à la guerison de ces grands maux par le moyen de la charité. Ce qui a tellement esté receu en l'Eglise, que ceste belle sentence a esté transcritte vne & deux fois dans les decrets de Gratien. Ainsi ce grand personnage qui auoit un esprit doux & deuotieux, iugeoit que ces maladies ne se deuoient traiter rudement & imperieusement, ains plustost en enseignant qu'en commandant, & qu'on y profitoit plus en admonestant qu'en me-

naçant : & que c'estoit la façon dont il se falloit gouverner enuers vn grand nombre de malfai-
cteurs : reseruant à vser de seuerité quand ils estoient peu. Et sil aduenoit que ceux qui ont l'authorité fussent contraints d'adiouster des menaces, qu'il falloit que ce fust avec regret, & que la crainte de punition fust proposée seulement de la force des escritures saintes : afin que ce qu'on les redoute ne soit point à cause de leur magistrat : mais que ce soit Dieu qui soit reueré en leurs ordonnances : comme il est amplement deduit en l'epistre addressée à l'Euesque Aurelius. Et certes, si nous voulons recognoistre la verité, il faut confesser qu'en tous les escrits de la sainte antiquité, il ne se trouue vn seul exemple approuué qu'on ait puny de mort aucun heretique : & au contraire que l'Eglise ancienne a tousiours eu en horreur de respendre le sang : que sil est quelquesfois aduenü, les vrais & saints Euesques l'ont tousiours detesté : comme il parut en Priscillien, qui ayant respendu par les Eglises de la Gaule, & principalement en Guyenne, les semences de la pernicieuse doctrine dont il estoit autheur, fut puny à mort en la ville de Treues, avec quelques autres de ses sectateurs, par le commandement de Maximus, autrement assez bon Prince, apres que pour vsurper l'Empire il eut faict tuer l'Empereur Gratian, en la ville de Lyon, enuiron l'an de nostre Seigneur trois cens quatre vingts trois : combien que S. Martin eust tiré promesse de l'Empereur qu'il ne seroit rien ordonné de cruel & de sanglant cõtre eux, & qu'il eust instãmēt exhorté & requis l'Euesque Itacius & leurs autres instigateurs de se deporter de l'accusation : Aussi cét acte fut trouué tres-mauuais, & reprouué

de tous les autres Euesques: & combien qu'Itacius apres auoir finement faict faire ceste execution, se fust absenté de peur de l'enuie, il ne laissa pas toutefois d'estre puis apres condamné par Theognistus & iamais saint Martin ne voulut qu'en toute extremité, & la nécessité le contraignant, se reconcilier & rejoindre en cette communion d'Itacius, & de ses adherents. Mesmes saint Ambroise enuoyé quelque temps apres vers Maximus par le ieune Valentinien frere de Gratien Empereur occis tesmoigne par le rapport de sa legation, qu'estant à Treves, il s'abstint de voir & frequenter ces Euesques qui participoient aux conseils d'Itacius, & qui faisoient punir de mort ceux qui erroient en la foy. Puis quand Maximus voulut enuoyer des Capitaines & gens de guerre en Espagne, avec souuerain pouuoir de rechercher les heretiques, & leur oster les biens & la vie: le mesme saint Martin y resista, & fit tant que l'Edict fut reuoké. Ce qu'il fit d'une sainte deuotion, non seulement pour deliurer les Chrestiens de cette vexation, dont on pouuoit prendre couleur sur cette occasion, mais aussi pour mettre en seureté les heretiques: preuoyant bien que si cet orage n'estoit destourné, il alloit ruiner vn grand nombre de gens de bien: y ayant lors peu de difference entre les vns & les autres: d'autant qu'on ne iugeoit les heretiques qu'à la face, les prenant plustost par la paleur de leur visage & à leur habit, que non pas par leur creance. De faict, apres que Priscillien fut executé à mort, tant s'en faut que l'heresie dont il estoit autheur en fut assoupie & retenüe, qu'au contraire elle s'estendit plus largement, & fut davantage confirmee: mesme que ses sectateurs qui auparauant ne luy auoient porté

honneur que cōme à vn saint personnage, cōmen-
 cerent à l'adorer comme vn Martyr, & firent rem-
 porter les corps morts iusques en Espagne, avec
 vne pompe admirable d'obseques magnifiques:
 dont nasquit vne telle superstition parmi ceux qui
 estoient de cette secte, qu'on tenoit à serment so-
 lemnel de iurer par le nom de Priscillien: Et de là
 s'alluma vne longue guerre & tres-dangereuse dis-
 corde, entre les Euesques de l'Eglise Gallicane,
 qui dura l'espace de plus de quinze ans, & ne se put
 estaindre qu'à grand peine: apres que plusieurs gēs
 de bien & la pauvre populace du troupeau de Dieu
 eurent beaucoup enduré d'outrages, & d'indigni-
 tez. Ce que ie ne puis lire, & voir discourir par Sul-
 pitius Seuerus, qui a écrit l'histoire de ce temps là,
 aussi fidelement qu'elegamment, qu'il ne me sou-
 uienne de l'estat où estoient les choses au temps de
 ma premiere ieunesse, lors que les troubles nou-
 uellement emus en France pour la religion, on te-
 noit pour suspects, & designoit-on de l'œil au
 meurtre & au massacre les hommes, non par leurs
 mœurs, & l'innocence de leur vie passée, ains seu-
 ment à leur visage, & à leur long reitre: pēdant que
 le pauvre Royaume se dissipoit en factions, & que
 par le trouble de l'estat, la religiō mesme estoit mi-
 se en grand danger: à cause des contentions &
 débats, inimitiez, faueurs, crainte, inconstan-
 ce, paresse, negligence, & arrogance de ceux
 qui auoient la souueraine autorité. Or apres le
 deceds de saint Martin, on commença à traiter
 plus doucement en l'Eglise ceux qui erroient en la
 foy; & ne faisoit-on plus que les deposer & degra-
 der, ou les condamner en quelque amende pecu-
 niaire, sans plus toucher au sang, & aux peines cor-
 por-

porelles: & quand il auint en l'an 1000. & 60. qu'un
 quidã des sectateurs de l'Archidiacre Berengarius
 vint semer la doctrine aux pays du Liege, de Bra-
 bant, & autres contrees du pays bas, Bruno Arche-
 uesque de Treues se contenta de les chasser de son
 diocese: sans iamais esprendre leur sang: Et depuis
 on ne les traita point plus rudement en l'Eglise,
 iusques au temps des Vaudois: contre lesquels on
 fut contraint dresser des armees completes, par ce
 que les suplices plus rigoureux n'auoient de
 rien serui, & que la maladie s'estoit empiree par les
 remedes appliquez mal à propos & hors de saison,
 dont le nombre des malades croissoit tous les iours
 Et falut mener vne longue guerre contre eux, de
 non moindre importance & despence que celle
 que les nostres auoient auparauant menee contre
 les Sarazins: De laquelle en fin l'issuë fut, qu'on
 les vit plustost morts, assommez, banniz, chassez
 de leurs maisons & dignitez, despouillez de leurs
 biens, & dissipez ça & là, que conuertis ou se
 repentants comme conuaincus d'erreur: telle-
 ment qu'apres s'estre du commencement defen-
 duz avec les armes, finablement vaincus & deffaits
 par les armes, ils furent contraints s'enfuir en Pro-
 uence, & dans les Alpes plus voisines de la France,
 où ils ont trouué des cachettes pour conseruer leur
 vie & leur doctrine: Vne partie se retira aussi en
 Calabre, & y a duré iusques au Pontificat de Pie
 4. Vne autre partie passa en Allemagne, & planta sa
 demeure en Boheme, en Pologne & en Liuonie.
 Les autres tirants vers l'Occident, se retirerent en
 Angleterre: Et croit-on que de leurs reliques
 estoit sorti Iehan Vviclef, qui enseigna long temps
 à Oxford, & apres plusieurs diuerses disputes pour

la region y mourut de sa mort naturelle, y a plus de trois cents ans : car l'exécution qui fut faicte contre luy par l'ordonnance du magistrat, ne fut qu'apres sa mort, que ses os deterrez furent brullez publiquement : Depuis il en est venu d'autres d'âge en âge iusques à nostre temps, cōtre lesquels apres auoir essayé sans aucun fruiet, la rigueur des supplices, les choses sont venues des disputes de paroles & d'écris, aux mains, & à la guerre ouuerte, dont se sont ensuiuies les reuoltes de plusieurs peuples, tant en Allemagne, & Angleterre qu'en nostre France: Et de là le chisme confirmé, avec autant de ruine de la tranquillité publique, que de scandale & dommage de la religion, de quoy ceux qui ont la puissance & qui deuroient en auoir soing, ne tiennent pas grand compte, & le mesprisent trop long temps. Ce que ie ne dy point pour remettre sus ceste question, tant de fois agitée, si les heretiques doiuent estre punis de mort: car cela ne conuient ny en la saison où nous sommes, ny à ma condition & qualité: mais seulement pour monstrier que les Princes ont tresbien & sagement faict, & selon l'institution de l'ancienne Eglise, qui ont estimé que les guerres entreprises pour la Religion se deuoient plustost amiablement composer, voire avec perte, & à quelque prix que ce soit, que non pas les definir & terminer par la force & rigueur des armes. De quoy Ferdinand tressage Prince s'aperceut bien: quand apres auoir appris par l'experience des longues & perilleuses guerres demenees en Allemagne sous l'Empereur Charles cinquieme son frere, que toutes les entreprises qu'on auoit faictes avec les armes contre les Protestans auoient tousiours mal reüssi, deslors qu'il se vit estably Empe-

reur, il confirma par vn Edict solemnel la paix faicte pour la Religion, & tousiours depuis la ratifiee par plusieurs & diuerses declarations. Et voyant que les affaires s'acheminoient beaucoup mieux par petits colloques, & conferences familiares, comme il en auoit desia fait l'essay sous l'Empire de son frere, aux assemblees qu'il auoit assignees à Regenspourg & à Vormes vn peu deuant sa mort apres le Concile de Trente, pour satisfaire aux protestans qui n'y auoient point comparu, il voulut de rechef assembler vn nouveau colloque avec eux par l'aduis & conseil de son fils Maximilien tressage Prince: & pour ce faire choisir vn fort docte homme & modeste Georges Cassander, qui deuoit traiter doucement avec les ministres & docteurs du party contraire, sur certains chefs & articles de la Confession d'Ausbourg: mais la maladie de ce bon personnage, & la mort auancee de l'vn & de l'autre empescha que l'Allemagne ne receust le fruit qu'elle en auoit esperé. De mesme façon par apres se gouernerent les Polonois à l'exemple des Allemands. Mais Emanuel Philebert Duc de Sauoye, se voyant remis par le benefice de la paix faicte avecques nous, en l'ancienne possession de ses estats perdus, pour aquerir de la reputation en Italie, ou pour gratifier aucuns avec sa perte s'alla legerement embrouiller en vne guerre fort dommageable contre ses sujets des vallees: dont il se repentit tout à loisir, & corrigea sa faute, permettant à ces pauvres peuples la liberté de leur religion, & garda par apres fort curieusement l'accord qu'il auoit fait avec eux. Je vien maintenant à nous, & commenceray à traiter l'ulcere, que ie crain biē ne pouuoir eulement toucher sans me faire tort, & m'aquerir

des ennemis: Mais puis que ie suis vne fois entré en ce discours, pour m'en depescher en vn mot, ie diray ingenuement: (car sous vous, Sire, il me l'est permis) que la guerre n'est point vn legitime moyen d'oster le schisme de l'Eglise. Nous auons veu en France que les huguenots durant la paix diminuoient tous les iours en nombre, & s'affoiblissoient d'autorité: aũ contraire se sont tousiours fortifiez & augmentez par les armes & guerres ciuiles, fust-ce que nous n'y allions que par vn zeile & ardeur desordonnee de religion: ou par vne ambition & desir de choses nouvelles: En quoy ceux des nostres ont grandemēt failly, & ont mis l'Eglise & la Frãce en grand dāger, qui apres tant d'Edits de pacification faits & refaits, sont si souuēt retournez aux troubles & aux armes cōtre eux: Qu'est-il besoing de paroles la chose mesme crie. Car quād la paix fut faicte en l'an 1563. & qu'une infinité de villes qui auoient esté occupees par tout le royaume, furēt reduictes en leur premier estat: ce fut vne merueille comment tout à coup chacun sentit la douceur du repos: & combien cest espace de quatre ans que dura la paix, iusques aux seconds tumultes, fut doux & agreable à tous les gens de bien: qui voyoient la Religion mise en seurété par les bonnes ordonnances de ce grand & incorruptible Chancelier, que la France n'aura iamais regret d'auoir receues, & pratiquees. Iusques à ce que les destinees tournants au contraire, nous commençasmes à nous ennuyer de voir la trāquillité publique si bien establie par ses saintes loix: & rejectans les auis qui tendoient à conseruer la paix, nous retournasmes à vne fascheuse guerre funeste, non seulement à nous, mais sur la fin aux auteurs
mesmes

mesmes qui en auoient donné le conseil. Ceux qui
 scauent ce qui fut arresté en ceste miserable assem-
 blee entreueüe de Bayonne, entendent assez de qui
 ie veux parler. Car depuis ce temps-là pour nous
 estre laillé abuser aux tromperies estrangeres, tou-
 tes choses commencerent à se preparer aux surpri-
 ses, aux trahisons, & aux armes. Deslors le Duc
 d'Albe fut enuoyé en Flandres, avec vne puissante
 armee, lequel ayant depossédé Marguerite Du-
 chesse de Parme de tout pouuoir & autorité, cõ-
 bien qu'elle eust paisiblement & moderément gou-
 uerné ces prouinces, réplit tout le pays de fer & de
 feu, bastit par tout des citadeles, ruina la franchise
 des peuples par impositions de nouueaux subides
 pour entretenir la guerre, & destruisit de grandes &
 riches villes, leur ostant leurs biens & leur liberté,
 comme qui osteroit les viures à de grands corps
 robustes & sains, pour les amaigrir & affoiblir. De
 ces dures & rigoureuses façons s'ensuiuirent les
 desespoirs, & finalement les reuoltes des peuples,
 lesquelles encor qu'on eust pour quelque temps
 racoysees, n'eurent en fin autre succez, sinon que
 la meilleure partie, & la plus riche, & plus propre
 à la nauigation, dont toutes les richesses de ces pro-
 uinces se maintiennent, se retrancha, & se des-vnit
 du reste du corps, & auiourd'huy se gouuerne par
 autorité d'Estats, faisant y a desia long temps la
 guerre, non seulement contre ceux du pays qui
 sont de contraire party, mais voire contre toutes
 les forces d'Espagne, avec profit & auancement.
 Ce que François Baldouin natif d'Arras, Iuriskon-
 sulte de nostre temps, de tres-grande reputation,
 auoit bien preueu, & auoit craint deuoir aduenir:
 & pour y obuier, il auoit donné conseil aux princi-

paux Seigneurs & Magistrats du pays, qu'ils presentassent requeste à Philippes Roy d'Espagne, pour impetrer liberte de Religion aux protestans qui pour lors estoient fort persecutez, & qu'il fist cesser ceste rigueur de les punir & rechercher par l'inquisition: Dequoy il composa vn liure en langue Françoise, par lequel il monstroic que le faict de la Religion, agité par tant de controuerses se porteroit mieux, & en viendroit-on plustost à bout, par colloques, où le droict fust également gardé aux parties, & où chacun fust receu à dire librement son aduis, que non pas par la force, & la voye des armes. Preuoyant bien & predisant que si on continuoit à les mal traiter, il aduiendroit que leurs forces qui estoient lors petites & espandues çà & là par factions, se joindroient & reüniroient ensemble, & que des disputes de paroles on viendroit aux mains, & aux reuoltes & rebellions en peu de temps. I'ay plus volontiers faict mention, meismement à vous, Sire, du presage de cét homme Flamand, parlant de Flandres, parce qu'il auoit du commencement embrassé la doctrine des protestans, mais par apres ayant feuilleté plus attentiuement les liures des Peres, s'estoit rauisé & auoit changé, toutesfois il auoit gardé vne telle equité & modération en l'esprit, qu'il ne s'estoit point laissé trāsporter d'vne haine irreconciliable contre ceux desquels il s'estoit separé, cōme aucuns font: mais par vn rare exēple de charité Chrestienne en ce tēps cy, s'estāt corrigé de sō erreur, il auoit pitié de celuy d'autruy, & employoit toute son industrie à ce que la memoire de la meilleure antiquité fust remise en vsage, & que ce que l'abus y auoit introduit fust doucemēt reformé. Et en ceste intention retourna

d'Allemagne en France, & se presenta à deffunct Mr. vostre pere, auquel il fit entendre & trouuer bon ce sage & saint aduis: puis fut receu à sa suite, où il tint vn honnestes rang, & quelquefois estoit employé & appelé aux affaires de son conseil, & par apres fut donné pour precepteur à M. vostre frere naturel en sa tendre ieunesse. Qu'on ne parle donc point de ces vanteries d'aucuns, qui veulēt sembler plus grands zelateurs de la religion que les autres, & se glorifient pour faire honte aux François, qu'ils n'ont iamais aprouué ny sousigné aucun accord avec les heretiques: qu'ils considerent quelle fin ont eu tous braues conseils, & qu'ils deplorent tant de riches & fortes prouinces qu'ils ont perduës, & tant de richesses & finances qu'ils ont consommées à les guerroyer pour neant. O combien ils voudroient maintenant auoir esté sages à nostre exemple, encor que pour lors ils fissent semblant de l'auoir en grand horreur: combien cherement ils voudroient auoir racheté la perte de tant d'armées, lesquelles s'ils eussent bien employées contre les communs ennemis de la Chrestienté, il y a long temps qu'ils les eussent chassées de Hongrie, & des Royaumes de Fez & Marroque, avec beaucoup de profit & d'honneur. Mais ie crains que prudence que nous trouuons defaillir en eux, n'ait manqué à nous mesmes, quand poussés de nostre propre fureur, ou à l'instigation de ceux que i'ay delia dict, nous donnâmes cependant occasion, à de tres-dangereux & pernicieux troubles: durant lesquels toutes les bonnes villes furent pillées, les Eglises que la rage des premiers tumultes auoit espargnées, de fond en comble abatuës, les prouinces sacagées: les rancunes qui auoient

quelque temps dormy durant la paix, renouellees
 pis que deuant : les soupçons augmentez ; puis les
 armes posees, pour estre biē tost apres reprises plus
 aigrement. Toutesfois apres tout cela salut-il fai-
 re vne paix, laquelle de tant plus qu'elle fut douce
 & agreable, de tāt plus miserablement fut-elle vio-
 lee, par vne meschancetē, qui deuroit s'il est licite
 de le desirer, estre enseuelie en eternal oubly : dont
 s'ensuiuit deux ans apres ceste boucherie où vous,
 SIRE, que Dieu auoit predestiné pour reestablis-
 l'Estat de France, faillistes à estre perdu : puis ayans
 esuitē le peril de ce rocher Capharee, nous rencon-
 trasmes encor dās deux ans apres d'autres escueils,
 contre lesquels avec la mesme imprudence, & te-
 merité, nous allasmes briser & faire naufrage : &
 l'ire de Dieu ne tarda gueres à venir faire vengean-
 ce de la perfidie des François, retirant de ce monde
 vn Roy magnanime qui auoit plustost failly par la
 coulpe d'autrui, que de sa propre volonté. Que fit
 son successeur ? Tout au commencement de son re-
 gne il ayma mieux la guerre que la paix contre les
 salutaires aduis que luy auoient dōnez l'Empereur
 Maximilien & le Senat de Venise, chez lesquels il
 auoit passé & logé en retournant de Poulongne, &
 contre les humbles prieres que luy en firent les hu-
 guenots de son Royauime à son arriuee : Mais il ne
 demeura gueres à s'en repentir, & changeant de
 conseil, trois ans apres fit cest Edict de Pacification,
 qu'il auoit accoustumé d'appeller particuliere-
 ment sien : Et depuis nous vescuimes en vne pro-
 fonde paix l'espace de sepr ans entiers : Sinon qu'en
 quelques endroits il y peult auoir quelques cour-
 ses, & rencontres de soldats par intervalles
 sans aucun grand effect. Iusques à ce que cer-

tains hommes impatiens du repos, & ne pouuans
 souffrir que la France se passast d'eux en ceste gran-
 de tranquillité, firent esmouuoir vne autre guerre
 tres-pernicieuse & hors de saison, à laquelle ce
 pauvre Prince se laissa emporter & forcer par le
 mauuais conseil de ceux qui estoient autour de luy,
 sous pretexte de s'opposer & prendre les armes
 contre vous, SIRE, mais qui bien tost apres se
 tournerent contre luy mesme. I'ay horreur de me
 souuenir de ce detestable parricide, qu'on ne peut
 raméteuoir qu'avec l'eternelle ignominie du nom
 François, & l'infamie de ceux qui pour lors s'en
 resiouyrent tant. Car il est indubitable que par cest
 execrable coup le royaume & avec le royaume la
 Religion ne s'en allassent tomber en vne ineuita-
 ble ruine, si vous, SIRE, par vne grace inesperee de
 Dieu, qui veillant pour nostre seureté, vous auoit
 reserué iusqu'à nostre temps, ne fussiez venu sou-
 stenir comme vn puissant pilier arcaboutât la cheu-
 te de cest Estat, & arrester par vostre vertu l'impe-
 tuosité de ceste rouë emportee au precipice, qui
 bouleuerçoit, brisoit, & abatoit tout ce qu'elle ren-
 controit de sain en la republique. En quoy vous
 montrastes vn notable exemple par vous-mesmes,
 que toutes choses se peuuent assuiettir aux loix hu-
 maines, fors la Religion qui ne peut, comme i'ay
 desia dict, estre forcee ny commandee. Car ayant
 esté persecuté dés vostre ieunesse par tant d'aduer-
 sitez entre les guerres ciuiles, & vous estant trouué
 assailly & environné de plusieurs armées en vn
 mesme temps, quelquefois batant, & quelquefois
 batu, & tousiours à la perte commune: (par ce que
 vaincre & estre vaincu, tournoit indifferemmēt au
 dommage public) encor qu'eussiez tousiours aupā-

rauant demeuré ferme en vostre premiere resolution, comme vn champion qui combat pied contre pied sans se bouger de sa place, & qu'eussiez resisté sans fleschir contre toutes les esperances ou craintes qu'on vous eust sceu proposer, à la fin neantmoins recognoissant que tout cedit à vostre vertu, aussi vous laissastes vous persuader & vaincre aux vœux & ardentés prieres de vos sujets, & au milieu de vos victoires, par vne gracieuse inspiration de Dieu, estes rentré en la religion de vos predecesseurs. Puis, comme vous auez l'esprit moderé en toutes choses, vous auez gardé cette mesme equité enuers les vôtres, que vous auiez resenti profitable à vous-mesmes: reuoquant tous les Edicts qui auoient esté publiez contre les huguenots, voire contre vous-mesmes outre le gré de vostre deuancier. Et apres auoir fait la paix, non seulement avec vos sujets, mais aussi avec les Princes estrangers vos voisins, qui vous acquit beaucoup de louange & d'honneur, vous renouelastes & confirmastes pour la troisieme fois, vn ou deux Edicts, qui auoient auparauant esté faits en faueur des huguenots: & par ce moyen les auez remis en leurs biens, maisons & familles, honneurs & bonne fame: & auez honoré aucuns d'eux des premiers dignitez du royaume: vous asseurant que les inimitiez peu à peu se ramollissants, l'vniõ & concorde que vos Edicts ordonnoient, s'establiroient plus aisement: & que les esprits bien rassis & remis en tranquillité, toutes passions chassées comme nuages qui offusquent le iugement, on cognoistroit plus facilement ce qui est le meilleur, c'est à dire le plus ancien en la religion. Ce fut la voye que ces bons Peres iugerēt

touſiours la meilleure, & qu'on deuoit tenir pour
 ramener ceux qui par mauuaife opinion ou arro-
 gance, & preſomption temeraire eſtoient deſuoy-
 ez de la regle & communion de l'Egliſe, pour mō-
 ſtrer qu'ils eſtoiēt pouſſez plus par charité que par
 vn deſir ambitieux de vaincre. Ainſi ſainct Augu-
 ſtin appelle par tout les Pelagiens du nom des freres.
 Ainſi Optat Milenitain qui eſtoit du meſme
 aage, nōme les Donatiſtes ſes freres. Ainſi aupara-
 uant eux ſainct Cyprien diſt, qu'il deſire & con-
 ſeille, & taſche de perſuader, qu'aucun des freres,
 ſi poſſible eſt, ne periſſe, & que l'Egliſe
 comme vne mere charitable, les retienne tous en
 ſon ſein, & que tous ne ſoient qu'un corps & vn
 peuple vni de volonte. Car à la verité il s'en trou-
 ue pluſieurs entre ceux avec qui nous auons debat
 pour la religion, qui ont (aſin que i'vſe des termes
 du meſme ſainct Auguſtin) quelque volonté ſe-
 grette de retourner avec nous, quand ils verroient
 les troubles bien apaifez. Mais ſ'ils en ſont empeſ-
 chez pour voir l'orage continuer, ou ſ'ils craignent
 qu'après leur reduction il renaſſe encor vne pire
 tempeſte, ils retiennent ce deſir, aſin de ſeruir aux
 foibles & non encor bien confirmez en pareille
 creance ſans ſe ſeparer de leur vnion, & ſouſtien-
 nent neantmoins par tous telmoignages & iuſques
 à la mort la foÿ qu'ils ſçauent eſtre preſchee en l'E-
 gliſe Chreſtienne, endurans patiemment les affli-
 ctions & iniures d'une part & d'autre pour ne trou-
 bler la paix de l'Egliſe, & nous monſtrans par leur
 exēple avec quelle affection, ſincerité, & charité, il
 faut ſeruir Dieu. Pour ceſte raiſon ayant appris par
 experience, & m'eſtant confirmé par voſtre exēple,
 qu'il ne falloit apporter aucune aigreur ny trouble

en l'Eglise: ie me suis abstenu d'inuectiues, & n'ay
 iamais parlé qu'avec hōneur des Protestās & Hu-
 guenots, principalemēt de ceux qui ont excellé aux
 lettres, & sciences: Aussi n'ay-je pas celé les vices
 des nōtres: croyant avec beaucoup de gens de biē,
 que ceux-là se trompent qui pensent que les here-
 sies qui traouillent auioird'huy presque tout le
 monde, se maintiennent & prennent vigueur par
 les ruses & malices de ceux qui en font profession,
 plus que par nos propres imperfections & abus.
 Mais à mon iugement on pourra fort bien reme-
 dier à l'vn & à l'autre mal: c'est à dire, à l'erreur de
 nos aduersaires, & à nos vices & defauts, si ostant le
 trafic qui se fait des estats en l'Eglise & en la Re-
 publique, on rend la recompense qui est deuē à la
 vertu: Et si les hommes qui excellent en pieté, do-
 cttrine & grauité de mœurs, & qui ayent desia faict
 preuue de leur prudence & moderation, sont es-
 leus aux charges & benefices de l'Eglise: Si ceux
 qui craignent Dieu, & qui sont d'integrité bien
 esproueuee, ennemis d'auarice, sont esleuez aux di-
 gnitez & magistratures: non pas de ieunes hōmes
 incognus qui y sont receus par faueur & par argēt,
 sans aucune recommandation de vertu. Autremēt
 si bons & mauuais y sont admis sans distinction, il
 est aisé à deuiner que la paix ne peut durer long
 temps: & faut necessairement que les citez peril-
 sent, qui sont gouuernees par gens qui ne peuuent
 ou ne veulēt discerner les hōmes de biē d'avec les
 meschans: & qui souffrent, ce qu'on dit en prouer-
 be, que les frelons mangent les fleurs qui doiuent
 estre pour les mousches à miel. Rien ne peut tant
 corrompre la fidelité que nous, qui auōs quelque of-
 fice ou charge publique en vostre royaume, deuōs
 premiere-

premieremēt à Dieu, puis à vous, Sire, & aux peuples qui sont sous vostre puissance, que le desir & l'esperāce d'un sale & deshōnelle gain: Par lequel si nous commençons d'entrer aux dignitez, il est à craindre que nous ne dressions là, par apres toutes nos pensees, & que l'auarice ne nous serue de guide, comme l'estoile du Nord aux mariniers, nous auenglant nous mesmes de cupidité d'amasser des richesses, & en fin mesprisant tout soing d'honnesteté que nous trompions la foy que nous aurons iuree & à Dieu & à vous. L'auarice est vne beste sauvage, cruelle & intollerable, à qui rien n'est iamais assez: Si avec les infinies richesses de France on adioustoit encor les montagnes d'or qu'on dit estre en Perse, & tous les thresors de l'une & de l'autre Indie, ils ne suffiroient pas pour la saouler. Car il n'y a iamais de mesure & de fin aux vices: Iamais ils ne s'arrestent; tousiours ils s'aduancent en leur precipice, & n'ont fin que leur ruine. Au contraire la vertu, comme dit le Poëte Simonides: tient ferme contre tous mouuemens de Fortune, ou des choses humaines, & ny plus ne moins qu'un cube ou un dé quarré demeure tousiours en un estat, s'accommodant à la Nature, qui diuersifie les accidens des hommes & garde tousiours vne libre & incorruptible vigueur d'esprit contente de soy-mesmes, & de soy-mesmes apte tout. Que si à telle Deesse qui rend les hōmes ainsi faicts, on redonne l'honneur & le lieu qui luy est deub, vous aurez encor abondamment de quoy faire largesse à ceux qui en seront dignes, avec le soulagement du peuple, & sans charger vostre Espargne. Et si ce n'est à vous d'en faire autāt en l'Eglise, pour le moins il vous apar-

tient, & sera soing conuenable & digne d'un Roy,
 de faire instance & priere, & d'interposer vostre au-
 thorité enuers ceux qui y sont obligez, pour tenir
 la main qu'ils y fassent leur deuoir. Auancez-vous
 donc, Sire, pour meriter la gloire de ceste nouuelle
 loüange: & vous souuienne que cét heureux repos,
 duquel nous jouissons tous maintenant avecques
 vous, & par vous, ne se peut esperer deuoir estre de
 longue duree, si ayants la paix par le bien-faict de
 Dieu, nous ne bandons serieusement nos esprits
 pour amplifier sa gloire, & composer les differents
 des cōtrouerses qui sont en la Religion. Il semble-
 ra, Sire, que ie vous conseille vne chose grāde, & la-
 quelle on ne doit legerement entreprendre, qui en
 voudra croire ceux qui se trouuants bien à leur aise
 pour le present, mesprisent & rejettent les conseils
 salutaires pour l'aduenir. Mais d'un grand soing,
 vient vne grāde recōpence: & vn grand esprit com-
 me le vostre, que Dieu vous a donné tout diuin, ne
 se peut adonner à petites choses. Certes, puis que
 vous auez reprimé ceste licence de piller & prodi-
 guer tout, & restably en chacune famille vne cer-
 taine regle de despence & frugalité, dont la France
 vous est, & sera à iamais obligee plus qu'on ne scau-
 roit dire: vous ne pouuez rien entreprēdre plus di-
 gne de vostre Majesté, & du haut degré que vous
 genez sur nous, que de mettre vn ordre en l'Eglise
 & en la Iustice, pour l'observatiō des droicts diuins
 & humains, que les troubles des guerres ciuiles ont
 si longuement confonduz, dont vous verrez indu-
 bitablement aduenir, & s'en ensuiure cela de bon,
 que l'ire de Dieu courroucé contre nous, sera pre-
 mierement appaisée, puis que les Euesques & Ma-
 gistrats feront vertueusement leur deuoir, chacun

en leur charge, & que la verité emportera l'aduantage contre le mensonge : la candeur & pureté contre le fard & la faintise : les loix contre l'auarice & le luxe : deux vices qui de soy sont contraires, mais que le mal-heur du siecle a meslez & cōioints ensemble : Qu'on pratique les bonnes mœurs : qu'on maintienne en honneur la pudeur & la modestie dont on s'est moqué iusqu'à present. Bref, qu'on recompense la vertu, & qu'on retranche le credit & le pouuoir de l'argent. C'est à vous, SIRE, à faire ce coup : car ie vous l'ay souuent ouy dire ainsi : quand vous desiriez auoir acheté ce bon-heur en vostre royaume par la perte d'un bras ou d'une iambe : C'est le commun souhait de tous vos bons sujets. Et c'est ce que pour mon regard i'estime necessaire au bien de l'estat public. Et si pour m'expliquer i'ay extrauagué en plus de paroles, & plus librement que i'en ay deub, vostre Majesté le prendra, s'il luy plaist, comme d'un homme franc & nourry en la liberté, que nous recognoissons tenir de vous, qui m'a faict iuger estre besoing de vous tenir un peu plus longuement au commencement de cet œuvre pour repousser l'enuie, & me munir contre les calomnies que ie preuoy deuoir naistre contre moy. Et combien que ce que i'en ay dict iusqu'icy soit suffisant à mon aduis pour m'excuser & me deffendre : Neantmoins voicy de mes amis qui m'aduertissent qu'il se trouuera des gens qui debatront & maintiendront que ie pouuoy bien me passer d'esplucher si exactement par le menu, les choses qui touchent les libertez, immunitiez, loix, & droicts de la France, & que ce que i'en ay faict semble plustost pour faire iniure à autrui, que pour la cōseruatiō de vostre dignité, & de

celle de vostre royaume. Ausquels encor que i'ay
 allez que respondre, toutefois ie crains que si i'vse
 en cela de trop long discours, quelqu'un ne pense
 que i'affecte cette occasion, & que ie prens plaisir à
 me battre moy-mesmes contre mon ombre. Mais
 aussi n'en disant mot, ie pourroy donner sujet aux
 mesdisants de me blasmer: le vous diray donc suc-
 cinctement, **SIRE**, comment il en va. I'ay receu
 ceste nourriture de mon pere, qui estoit comme
 chacun sçait, vray prud'homme, & fort entier en la
 Religion Catholique. I'ay appris ces enseignemens
 comme de main en main de mon grand pere, & de
 mon ayeul: Et de moy-mesmes suis entré en l'ad-
 ministration de vostre iustice avec ceste resolutiõ,
 que rien apres Dieu, ne me fust plus cher, & recom-
 mandé que l'amour & le seruice de ma patrie, que
 i'ay toujours preferée à toutes autres affections &
 charitez priuées: Car ie me suis toujours persuadé
 que nostre patrie, selon la sentence des anciens,
 nous est vn autre Dieu: & que les loix du pays nous
 sont de seconds Dieux: & que ceux qui les violent,
 quelque couleur ou pretexte de pieté qu'ils y re-
 cherchent pour leur defense, sont coupables de
 parricide, & de sacrilege. Et à la verité nous se-
 rions indignes du nom François, & tenus pour tres-
 mauvais citoyens, si mesmement durant vostre re-
 gne, nous ne nous oposions à bon escient à ce mal,
 pour empescher ceux (si aucuns sont, & pleust à Dieu
 qu'il n'y en eust point) qui par mines & machi-
 nes secretes, parce qu'ils ne le peuvent faire par
 force ouuerte, veulent renuerfer ces beaux droicts
 & ces anciennes loix, sur lesquelles ce royaume
 a pris son fondement, & s'est esleué en ceste puis-
 sance & admirable grandeur. C'est vn ancien dire

de nos majeurs tres-affectionnez en la Religion: que l'un, c'est à dire la Religion, estoit vn gage du ciel pour asseurer nostre salut. Et l'autre, c'est à dire, les loix & droicts anciens du royaume, estoient le Palladium de la France & de toutes les Gaules, quant aux biens & à la Dignité. De sorte que tant que nous tiendrons ceste forteresse, nous n'aurons rien à craindre des embusches des estrangers: mais si nous la perdons, nous n'aurons plus rien de certain & d'assuré contre eux. Et s'il aduenoit que par nostre faineantise & lascheté, nous la laissassions surprendre: il ne faut pas douter que celuy mesme qui par mauuais artifices nous l'auroit enleuee, instruiet comme vn autre Vlysses des ruses de son pays, ne subornast vn autre Sinon, & n'envoyast en France vn second cheual fatal, le ventre plein de gens-d'armes, pour saccager du mesme feu dont Troye fut consummee, la plus belle & florissante partie de l'Europe. Mais Dieu nous en contregardera s'il luy plaist: car nous n'auons rien à craindre de tel, tant qu'il vous maintiendra viuant & sain: & qu'il nous conseruera Monseigneur le Dauphin. Cest endroict icy paraduventure requerroit qu'on discourust plus amplement de vous, à qui nous deuons ce que nous viuons, & que nous iouyssons de nostre pays, & de nos biens: & seroit à propos de mentionner tant de graces & de munificences qu'avez faites au public. Ce que ceux entendront de moy, qui mesureront les choses plustost par la grâdeur de vos louiâges, que par la mediocrité de mon esprit. Mais ie ne pretens pas faire icy vn Panegiric de vos prouesses, & ie sçay que vous avez plus de contentement en vostre conscience d'auoir bien fait, que prenez de plaisir à ouyr prescher

vos vaillances. Vous estes yssu d'une famille la plus noble & ancienne de toutes celles qui ont iamais porté couronne: Et estant né bien loing entre les monts Pirenees d'une lignee qui se cōtinue dès son commencement de masse en masse; Vous avez pris accroissance entre les armes, parmy les aduersitez, eschapé de mille embusches qu'on vous a dressées lors qu'estiez encor enfant: puis fait adolescent, & deuenu hōme parfait, vous avez rabatu viuement la violēce de vos ennemis: Et semble que dieu vous ait amené par la main du fond de la Guyenne en des temps fort dangereux iusques au sein du feu Roy qui vous y apeloit: afin qu'il n'y eust personne que le legitime heritier, qui peust occuper le siege Royal, qui deuoit estre bien tost vacant. De là estant fait Roy, vous avez temperé vostre puissance de clemēce & benignité: aymāt mieux retenir par biēfaits les esprits alienez de vous, que par la terreur & la crainte: Puis soudain ceux qui vous estoiet les plus ennemis priēt telle creance & cōfiāce en vous, qu'ils estimerēt auoir plus de seureté en vostre misericorde, qu'en leurs forces & en leurs armes: & ne se plaignoiet pas tant d'estre vaincus, cōme ils s'esioyssent que vous fussiez leur vainqueur. De supplians ils furent faits vos amis & familiers, & leur demeura plus de sentiment en l'ame d'auoir failly, qu'à vous d'auoir esté offensé: de sorte que leur pardonnant si facilement, vous fistes qu'ils auoient vn extreme regret de n'auoir pas reconnu leur faute assez tost. Et de fait que pouuoient-ils mieux faire que de ceder volontairement au cours impetueux de vos victoires, auquel ils voyoient bien que rien ne pouuoit rester? leur meilleur fut d'attendre la clemence

du vainqueur, plustost que le hasard du combat: Car vous auiez faict par vostre vertu que l'issue des batailles n'estoit plus douteuse, & que la victoire n'auoit plus d'aisles pour voler incertainement d'une part ou d'autre: Vous aydiez à ce bon-heur par vostre vigilance: par vostre trauail indefatigable: par vostre patience à supporter les chaleurs, & les froidures, vous contentant des viandes que le lieu & le temps presentoit: assidu aux tranches: iour & nuict continuellement en faction: tousiours sur pieds, quelque temps de gelee ou de pluye qu'il sceust faire, dormant peu, & quelquefois tout à cheual, ou sur la terre enuelopé d'un manteau, entre coupant & reprenant vostre sommeil à toute heure, & pour si peu de temps qu'il vous plaisoit, sans aucune incommodité de vostre santé. Et de cette façon par vostre exemple, qui est vn doux moyen de commander, vous faisiez garder entre vos gens de guerre sans les payer ny soldoyer, la discipline, que difficilement les autres gardent encor qu'ils soient bien payez. Avec ce bon-heur, vous-vous estiez tellement rendu formidable & redouté à tous vos ennemis, que combien qu'ils eussent quelquefois plus grand nombre d'hommes & de munitions de guerre que vous, toutefois ils pensoient assez faire de s'aller enfermer & mettre à couuert dans les fortresses des meilleures villes & chasteaux qu'ils eussent en leur puissance: & ne tenoient pas à moins d'honneur de se sauuer de vous, que vous auiez de gloire à les vaincre. De sorte qu'il ne se faut pas esmerueiller, si apres vous auoir si griefuement offensé, ils ont embrassé avec tât d'ardeur l'ocasiõ que Dieu leur presentoit de se reconcilier avecques vous: puis qu'ils

auoient tant d'assurance de vostre clemence & bonté non feinte : & ne pouuans douter que la victoire ne fust tousiours de vostre part. Mais comme la guerre & les combats leur estoient espouuantables, autant que la paix a esté desirée, & agreable à tous les vostres qu'avez repris en grace, quād incontinent la paix faicte vous avez remis sus par toutvostreRoyaume, les arts liberaux, y proposant le salaire, & les priuileges pour y exciter vn chascun. Tesmoings en sont ces grands & superbes bastiments esleuez en si peu de temps & durables à iamais. Tesmoins tant d'ouurages admirables de peintures, de tapisseries, eslabourees d'vn artifice excellent, qui tesmoigneront à la posterité la grandeur de vostre entendement, & l'amour qu'avez porté à la paix. Mais nous auons deuant toutes choses grand sujet de vous remercier, de ce qu'il vous a pleu remettre les Muses en leur place, dont la fureur des armes les auoit chassées : & de ce qu'avez restably la fameuse Vniuersité de Paris : à laquelle vous avez encor adiousté vn insigne ornement, y appellant ceste autre grande lumiere des lettres de nostre siecle, Isaac Casaubon; & luy commettant la garde de vostre Royale Librairie : pour faire cognoistre à tout le monde, que le cours continuel de tant de victoires & triomphes ne vous a point tant haussé le cœur pour desirer de grandes choses, & pour entreprendre sur vos voisins, comme pour bien obseruer la paix avec eux, & entretenir en vn ferme repos vos peuples, las & trauaillez des guerres passées.

Poursuinez dōc, Sire, ce noble & genereux dessein, & continuez d'establir la paix, laquelle vous nous avez acquise par tant de trauaux qu'avez endurez

pour

pour vostre patrie, & rendez l'authorité aux loix & à vos Cours de Parlement, comme auez cōmençé, tenant pour tout certain que les villes & citez n'ont ame, vie, & mouuement que par les loix : & ne peuuent non plus que nos corps qui n'auroient point d'ame, vser de leurs membres, de leurs forces, & de leur sang, si elles n'obeissent aux loix. Or les Magistrats & les Iuges sont les ministres & interpretes des loix : desquelles en fin nous deuons tous estre serfs, pour pouuoir estre tous libres.

C'est cette liberté que ie me suis assuré de trouuer, vous estant Roy, du benefice de laquelle i'ay vſé si tost que vous nous l'eustes rendue, quand durant les troubles, & depuis iceux appaisez, i'ay escrit l'histoire de nostre temps : dont ie donne maintenant au public la premiere partie, & la dedie au tres-auguste nō de vostre Maieſté, pour beaucoup de raisons qui me touchent & qui appartiennent au sujet de l'œuvre. Je seroy ingrat, s'il ne me fouuenoit, que la dignité que i'ay en vostre iustice, ayant eu son commencement des vostre predecesseur d'heureuse memoire, m'a esté par vous augmentee & auancee au degré où ie suis : & que quand i'estoy à la suite de vostre armee & de vostre Cour, vous m'auiez employé en beaucoup de grāds affaires : par le manimēt desquelles ie me suis acquis la cognoissance d'infinies choses, qui estoient necessaires à l'œuvre que i'ay entrepris. A quoy m'a beaucoup serui la familiarité que i'ay eüe avec plusieurs notables Seigneurs nourris & vieilliss à la Cour : dont les discours m'apprenoient à examiner plus curieusement ces petits liurets semez & imprimez ça & là sans auteur, & reduire au poinct de la verité tout ce qui se trouuoit escrit de nos affaires.

Et en ceste estude parmy celles de ma charge, ie me suis excercé tant que i'ay esté à vostre suite iusques à ce que la necessité de mon office m'a faict retourner à cest hastelier du palais : Or ne suis-ie point cogneu de vous seulement d'hier, ou deuant hier, il y a desia vingt & deux ans passez, qu'estant vn des deputez du Parlement pour la chambre de iustice, qui fut enuoyee en Guyenne par le commandement du feu Roy, ie fu vers vous où ie receu tant de bon acueil & de gracieux traictement, que dès lors ie pris asseurance qu'aurez agreables les fruiçts de mon esprit, si quelque iour sa petitessie en pouuoit produire. Mais outre ceste raison, il y en a vne autre beaucoup plus pertinente, pourquoy il a falu que ceste histoire vous fust dediee. Sçauoir est, qu'entreprenant vn ouurage plein de hazard & de danger, i'auoy besoing pour resister à la maldisance & violence de beaucoup de gens ennemis de la verité, d'auoir vn puissant patron : & pour examiner la verité des choses aduenues, il me falloit recourir à vostre aigu & vigoureux iugement, avec lequel vous ordonnez de celles qui sont à venir. Aussi suis-ie resolu d'en passer par vostre censure : Soit que vous trouuiez bon que ie publie le reste, ou que ie supprime ceste premiere partie, qui n'est pas tant pour estre communiquee au public, que pous vous proposer comme l'image & l'argument de tout l'œuure : duquel ce que vous ordonnerez & commanderez, me sera comme vn oracle prononcé de la voix de Dieu : ne faisant aucun doute que ce que vous approuuerez, ne soit approuué & bien receu avec vn grand consentement de tout le monde. Et s'il s'en treuue aucuns qui trouuoient mauuais ce que vous trouuerez bon, ce seront ceux qui estants

montez par le jouët de fortune en quelque haute dignité, sans auoir rien faict digne de memoire, croient que la representation des choses comme elles sont auenues à la verité, leur soit preiudiciable & iniurieuse : Mais comme i'estime deshonneste & honteux pour ma reputation, de leur complaire & seruir à leurs iniques desirs, aussi croiroi-je grandement offencer ma consciëce, de taire & passer sous silence leur vices, mesmement ceux qui portent dommage au public. Or il faut finir ceste Preface par vne priere à Dieu.

Seigneur, qui es authœur & dispensateur de tous biens, qui avec ton fils vnique & le saint Esprit estes trois, mais en puissance, sagesse & bonté, n'es qu'vn en toutes choses, & tousiours seras & as esté: qui disposes, & gouernes par ta prudence les empires legitimes, sans lesquels il n'y a ni maison, ni famille, ni cité, ni nation, ni mesmes tout le genre humain & la nature vniuerselle par toy creéc de rien ne peut subsister: le te requiers & supplie à haute voix & publiquement, vouloir garder pour nous ce que tu as donné de meilleur à la France, voire à toute la Chrestienté: luy assister de tes graces & rendre sa memoire immortelle, Ce que tu nous peux accorder & accomplir tout ensemble, en conseruant le Roy & le Dauphin. Car nous recognoißons & cōfessons que de leur seule cōseruation dependent la paix, l'vnion, la seureté, les biens, & toutes choses que sçaurions desirer. Preside donc aux conseils de l'vn pour gouerner ce grand Empire par luy sauué du naufrage, pendant que l'autre croistra, comme vn arbrisseau plâté sur le bord d'un ruisseau doux coulant, pour faire quelque iour ombre à ceux qui viendront apres nous: c'est à dire pour les

maintenir en repos, pendant lequel les arts sont
 cultivez, & l'estude de pieté & des lettres augmen-
 té. Permits que tous deux seigneurient & com-
 mandent sur les François, par vn ordre amy de na-
 ture & des gens de bien. Que par eux l'ancienne
 foy & Religion, les mœurs & institutions de nos
 maieurs, & les loix du pays soyent remises en leur
 vigueur: que les monstres des nouuelles sectes, les
 nouveaux songes des religions, & toutes autres
 inuentions pour abuser finement les esprits oylifs,
 soient abolies: afin que le schisme osté la paix soit
 finablement establie en la maison de Dieu, le re-
 pos en nos consciences, & la seureté en l'estat pu-
 blic. Potir la fin, Seigneur Dieu tres-bon, & tres-
 grand, ie te prie & supplie par la grace de ton saint
 Esprit, sans laquelle nous ne sommes ny ne pou-
 uons rien, donne telle force à ce que ie diray, & es-
 critay cy-apres, que ceux qui viuent à present, & qui
 viendront apres nous, recognoissent ma liberté re-
 glee de ma conscience & de la verité, Et que mon
 style soit aussi eslongné de flaterie & de calomnie,
 cōme ie n'ay point luyet qui m'y puisse cōtraindre.

EXTRACT DV
Privilege du Roy.

PAr grace & privilege du Roy, il est permis à PIERRE CHEVALIER Imprimeur & Libraire iuré à Paris, d'imprimer l'Epistre de Monsieur le President de Thou, au tres-Chrestien Roy de France & de Navarre, & deffence à tous autres, à peine de mil liures d'amande, applicable moitié à nous, & l'autre moitié audit suppliant, car tel est nostre plaisir.

Par le Roy en son Conseil.

Signé CHALOPIN.

EXTRAICT DV

Privilege du Roy.

Pour Arrière & privilege du Roy, il est par
mis à Pierre Chevaller imprimeur
en la Librairie de Paris, d'imprimer
l'Epistre de Monsieur le President de Thou,
aux tres-Christien Roy de France & de Navarre,
& de l'enceinte à tous autres, à peine de
mil livres d'amende, applicable moitié
pour nous, & l'autre moitié au dit imprimeur, car
cel est nostre plaisir.

Fait le Roy en son Conseil.

Signé Charles.

